



宋蘓子瞻表啟

密州謝上表

徐州謝上表

徐州謝獎諭表

徐州謝河平表

湖州謝上表

到黃州謝表

謝徐州失覺察妖賊放罪表

謝量移汝州表

乞常州居住表

到常州謝表二首

登州謝上表

辭免起居舍人第二狀

謝中書舍人表

謝宣召入院狀

謝翰林學士表

謝對衣金帶馬表二首

謝除侍讀第二表

謝賜御書詩表

謝除龍圖閣學士表二首

謝賜對衣金帶馬表二首

杭州謝上表二首

杭州謝放罪表二首

謝賜曆日治書表二首

謝賜膳表

上皇帝賀冬表

辭免翰林學士承旨狀二首

謝宣召再入學士院狀二首

謝賜對衣金帶馬狀二首

謝兼侍讀表二首

謝三伏早休表二首

謝除龍圖閣學士知潁州表二首

謝賜對衣金帶馬表二首

潁州謝到任表二首

上清儲祥宮成賀德音第二表

賀駕幸太學表

謝賜曆日表

揚州謝到任表二首

謝賜卹刑詔書表二首

賀立皇后表二首

謝除兵部尚書賜對衣金帶馬狀二首

謝兼侍讀表

謝賜對衣金帶馬狀二首

定州謝到任表

慰宣仁聖烈皇后山陵禮畢表

慰宣仁聖烈皇后祔廟禮畢表

謝賜衣襖表

到惠州謝表

到昌化軍謝表

提舉玉局觀謝表

荅杭州交代啟

荅館職啟

穎州到任謝執政啟

與京西運使劉昱啟

揚州到任謝執政啟

賀彭發運啟

定州到任謝執政啟

謝諸郡啟

荅丁連州啟

荅陳提刑啟

荅彭賀州啟

荅王承議啟

荅王幼安宣撫啟

賀楊龍圖啟

賀毆陽少師致仕啟

謝監司薦舉啟

徐州謝兩府啟

賀趙大資致政啟

登州謝兩府啟

謝賈朝奉啟

荅范端明啟

杭州謝執政啟

荅杭州交代啟

謝生日詩啟

賀林待制啟

求昏啟

賀冬啟

謝大使土物啟

謝管設大使啟

副使啟

賀時宰啟

徐州謝隣郡陳彥升啟

黃州還回太守畢仲遠啟

撫管若大封題

撫大封土封題

贊於題

末習題

贊林封補題

撫中日封題

贊於州文外題

陶石簣先生批選唐宋六家表啟

宋眉山蘇軾子瞻

密州謝上表

草芥賤微敢干洪造乾坤廣大曲遂私誠受命撫躬已自知於不稱入境問俗又復過於所期

中謝

伏念臣家世至寒性資甚下學雖篤志本先朝進士篆刻之文論不適時皆老生常談陳腐之說分於聖世處以散材一自離去闕庭屢更歲籥塵埃筆硯漸忘舊學之淵源奔走簿書粗識小人之情

僞欲自試於民社庶有助於涓埃以爲公朝不廢私願攜孥上國預憂桂玉之不克請郡東方實欲第昆之相近自惟何幸動獲所求雖父兄所以處臣其僥倖不過如此誰云踈外有此遭逢此蓋伏遇皇帝陛下躬上聖之資建太平之業以爲人無賢愚皆有可用故雖如臣等輩猶未盡捐臣敢不仰認至恩益堅素守推廣中和之政撫綏疲瘵之民要使民之安臣則爲臣之報國

徐州謝上表

分符高密已竊名邦改命東徐復塵督府荷恩深厚撫已兢慙中謝伏念臣奮身農畝託迹書林信道直前曾無坎井之避立朝寡助誰爲先後之容向者屢獻警言仰塵聖鑒豈有意於爲異蓋篤信其所聞顧慙迂闊之言雖多而無益惟有朴忠之素旣久而猶堅遠不忘君未忍改其常度言之無罪實深恃於至仁知臣者謂臣愛君不知臣者謂臣多事空懷此意誰復見明伏惟皇帝陛下日月照臨乾坤覆燾察孤危之易毀諒拙直之無他安

全陋軀畀付善地民淳訟簡殊無施設之方食足
身閑仰愧生成之賜顧力報之無所懷孤忠而自
憐。

徐州謝獎諭表

奔走服勤人臣之常事褒稱勞勉學者之至榮自
惟何人乃辱斯語。中謝伏念臣學無師法才與世
疎經術既已不深吏事又其所短累忝優寄卒無
異稱寬如定遠之言平平無取拙比道州之政下
下宜然乃者河決澶淵毒流淮泗百堵皆作蓋條

吏之劬勞三板不沈本朝廷之威德而臣下掠衆
美上貪天功獨竊壘書之榮以爲私室之寶此蓋
伏遇皇帝陛下天覆四海子養萬民哀無辜之遭
罹特遣使以存問旣蠲免其賦調又飲食其饑寒
所以錄臣之微勞蓋將責臣之來效臣敢不躬親
畚築益修今歲之防安集流亡盡復平時之業庶
殫朽鈍少補絲毫。

徐州賀河平表

聖謨獨運天眷莫違庶邦子來民罔告病萬杵雷

動、役、不、逾、時、遂、消、東、北、莫、大、之、憂、然、後、麥、禾、可、得、
而、食、人、無、後、患、喜、若、再、生、中謝伏、以、大、河、爲、災、歷、
世、所、病、禹、治、兗、州、之、野、十、有、三、載、乃、同、漢、築、宣、防、
之、宮、二、十、餘、年、而、定、未、有、收、狂、瀾、於、旣、潰、復、故、道、
於、將、堙、俛、仰、而、成、神、速、若、此、恭、惟、皇、帝、陛、下、至、仁、
博、施、神、智、無、方、達、四、聰、以、來、衆、言、廣、大、孝、以、安、宗、
廟、水、當、潤、下、河、不、溢、流、屬、歲、久、之、無、虞、故、患、生、於、
所、忽、方、其、決、也、本、吏、失、其、防、而、非、天、意、及、其、復、也、
蓋、天、助、有、德、而、非、人、功、振、古、所、無、溥、天、同、慶、維、豐、

沛、之、大、澤、實、汴、泗、之、所、鍾、伊、昔、橫、流、凜、孤、城、之、若、
塊、迨、茲、平、定、蔚、秋、稼、以、如、雲、害、旣、廣、則、利、多、憂、獨、
深、而、喜、倍、雖、官、守、有、限、不、獲、趨、外、庭、以、稱、觴、而、民、
意、所、同、亦、能、杼、下、情、而、作、頌、

湖州謝上表

風、俗、阜、安、在、東、南、號、爲、無、事、山、水、清、遠、本、朝、廷、所、
以、優、賢、顧、惟、何、人、亦、與、茲、選、中謝伏、念、臣、性、資、頑、
鄙、名、迹、堙、微、議、論、闊、踈、文、學、淺、陋、凡、人、必、有、一、得、
而、臣、獨、無、寸、長、荷、先、帝、之、誤、恩、擢、寘、三、館、蒙、陛、下、

之過聽付以兩州非不欲痛自激昂少酌恩造而才分所局有過無功法令具存雖勤何補罪固多矣臣猶知之夫何越次之名邦更許借資而顯受顧惟無狀豈不知恩此蓋伏遇皇帝陛下天覆羣生海涵萬族用人不求其備嘉善而矜不能知其愚不適時難以追陪新進察其老不生事或能牧養小民而臣頃在錢塘樂其風土魚鳥之性既自得於江湖吳越之人亦安臣之教令敢不奉法勤職息訟平刑上以廣朝廷之仁下以慰父老之望

到黃州謝表

狂愚冒犯固有常刑仁聖矜憐特從輕典赦其必死許以自新祇服訓辭惟知感涕中謝伏念臣早緣科第誤忝縉紳親逢睿哲之興遂有功名之意亦嘗召對便殿考其所學之言試守三州觀其所行之實而臣用意過當自趨於迷賦命衰窮天奪其魄叛逆義理辜負恩私茫如醉夢之中不知言語之出雖至仁屢赦而衆議不容案罪責情固宜伏斧鑕於兩觀推恩屈法猶當禦魑魅於三危豈

謂尚玷散員更叨善地投畀磨廳之野保全樗櫟
之生臣雖至愚豈不知幸此蓋伏遇皇帝陛下德
刑並用善惡兼容欲使法行而知恩是用小懲而
大戒天地能覆載之而不能容之於度外父母能
生育之而不能出之於死中伏惟此恩何以爲報
惟當蔬食沒齒杜門思愆深悟積年之非永爲多
士之戒貪戀聖世不敢殺身庶幾餘生未爲棄物
若獲盡力鞭箠之下必將捐軀矢石之間指天誓
心有死無易

謝徐州失覺察妖賊放罪表

盜發所臨守臣固當重責罪疑則赦聖主所以廣
恩自驚廢逐之餘猶在愍憐之數中謝伏念臣早

蒙殊遇擢領大邦上不能以道化民達忠孝於所
部下不能以刑齊物消姦宄於未萌致使妄庸敢
圖僭逆原其不職夫豈勝誅况茲溝瀆之中重遇
雷霆之譴無官可削撫已知危至於捕斬羣盜之
功乃是隣近一夫之力靖言其始偶出於臣雖爲
國督奸常懷此志而因人成事豈足言勞勉自列

於涓埃庶少寬於斧鉞豈謂蕩然之澤許以勿推
收驚魄於散亡假餘生之畧刻退思所自爲幸何
多此蓋伏遇皇帝陛下舞虞舜之干示人不殺祝
成湯之網與物求生其間用刑本不得已稍有可
赦無不從寬務在考實而原情何嘗記過而忘善
益悟向時之所坐皆是微臣之自貽感愧終身論
報無地布衣蔬食或未死於饑寒石心木腸誓不
忘於忠義

謝量移汝州表

稍從內遷示不終棄罪已甘於萬死恩實出於再
生祇服訓詞惟知感涕中謝伏念臣向者名過其
實食浮於人兄弟並竊於賢科衣冠或以爲盛事
旋從冊府出領郡符旣無片善可紀於絲毫而以
重罪當膏於斧鉞雖蒙恩貸有愧平生隻影自憐
命寄江湖之上驚魂未定夢游縲紲之中憔悴非
人章狂失志妻孥之所竊笑親友至於絕交疾病
連年人皆相傳爲已死飢寒併日臣亦自厭其餘
生豈謂草芥之賤微尚煩朝廷之紀錄開其恫悔

許以甄收此蓋伏遇皇帝陛下湯德日新堯仁天
覆建原廟以安祖考正六宮而修典刑百廢具興
多士爰集彈冠結綬共欣千載之逢掩面向隅不
忍一夫之泣故推涓滴以及焦枯顧惟效死之無
門殺身何益更欲呼天而自列尚口乃窮徒有此
心期於異日

乞常州居住表

臣聞聖人之行法也如雷霆之震草木威怒雖甚
而歸於欲其生人主之罪人也如父母之譴子孫

鞭撻雖嚴而不忍致之死臣漂流棄物枯槁餘生
泣血書詞呼天請命願回日月之照一明葵藿之
心此言朝聞夕死無憾中謝臣昔者嘗對便殿親
聞德音似蒙聖知不在人後而狂狷妄發上負恩
私既有司皆以為可誅雖明主不得而獨赦一從
吏議坐廢五年積憂薰心驚齒髮之先變抱恨刻
骨傷皮肉之僅存近者蒙恩量移汝州伏讀訓詞
有人材實難弗思終棄之語豈獨知免於縲紲亦
將有望於桑榆但未死亡終見天日豈敢復以遲

慕爲歎更生僥覲之心但以祿廩久空衣食不繼累重道遠不免舟行自離黃州風濤驚恐舉家重病一子喪亾今雖已至泗州而貲用罄竭去汝尚遠難於陸行無屋可居無田可食二十餘口不知所歸飢寒之憂近在朝夕與其強顏忍耻干求於衆人不若歸命投誠控告於君父臣有薄田在常州宜興縣粗給饘粥欲望聖慈許於常州居住又恐罪戾至重未可聽從便安輒叙微勞庶蒙恩貸臣先任徐州日以河水浸城幾至淪陷臣日夜守

捍偶獲安全曾蒙朝廷降勅獎諭又嘗選用沂州百姓程棐令購捕凶黨致獲謀反妖賊李鐸郭進等一十七人亦蒙聖恩保明放罪皆臣子之常分無涓埃之可言冒昧自陳出於窮迫庶幾因緣僥倖功過相除稍出羈囚得從所便重念臣受性剛褊賦命竒窮旣獲罪於天又無助於下怨仇交積罪惡橫生羣言或起於愛憎孤忠遂陷於疑似中雖無愧不敢自明向非人主獨賜保全則臣之微生豈有今日伏惟皇帝陛下聖神天縱文武生知

得天下之英才已全三樂躋斯民於仁壽不棄一
夫勃然中興可謂盡善而臣抱百年之永嘆悼一
飽之無時貧病交攻死生莫保雖鳧鴈飛集何足
計於江湖而犬馬蓋惟猶有求於陛下敢祈仁聖
少賜矜憐

到常州謝表

積釁難磨未經洗滌至仁易感許即便安祇荷寵
靈惟知感涕中謝伏念臣所犯罪戾本合誅夷向
非先帝之至明豈有餘生於今日銜恩未報有志

不從已分沒身寄殘骸於魑魅敢期擇地收暮景
於桑榆此蓋伏遇皇帝陛下仁孝生知聰明天縱
寅奉上帝之眷命述修累聖之成謀念此菅蒯之
微庶幾簪履之舊俾安田畝稍出縲囚飽食無思
但日陶於新化杜門自省當益念於往愆

又表

罪大人微自甘永棄食貧口衆未免求安忽奉俞
音出於獨斷仰銜恩施不覺涕零中謝伏念臣猥
以凡才早塵仕籍生逢有作之聖獨抱不移之愚

廢棄六年已忘形於田野、泝泐萬里、偶脫命於江、潭、豈謂此生得從所便、此蓋伏遇太皇太后陛下、厚德載物、至仁代天、春生秋成、本無心於草木、風行雷動、自有信於蟲魚、致此幽頑、亦叨恩宥、耕田鑿井、得漸齒於平民、碎首剝肝、尚未知其死所、

登州謝上表

登雖小郡、地號極邊、日驚縲紲之餘、忽有民社之寄、拜恩不次、隕涕何言、中謝臣聞臣不密則失身、而臣無周身之智、人不可以無學、而臣有不學之

愚、積此兩愆、本當萬死、坐受六年之謫、甘如五鼎之珍、擊鼓登聞、止求自便、買田陽羨、誓畢此生、豈期枯朽之中、有此遭逢之異、收召魂魄、復為平人、洗濯瑕玼、盡還舊物、此蓋伏遇皇帝陛下、內行曾閔之孝、外發禹湯之仁、日將旦而四海明、天方春而萬物作、於其黨而觀過、謂臣或出於愛君、就所短而求長、知臣稍習於治郡、致茲異寵、驟及菲才、恭惟先帝全臣於衆怒、必死之中、陛下起臣於散官、永棄之地、沒身難報、碎首為期、

又表

寵命過優、訓詞尤厚、非臣愚蠢所克承當。中謝臣
所領州下臨漲海、人淳事簡、地瘠民貧、入境問農、
首見父老、戴白扶杖、爭來馬前、皆云枯朽之餘、死
亡無日、雖在田野、亦有識知、恭聞聖母至明而慈、
嗣皇至仁而孝、每下號令、人皆涕流、願忍垂死之
年、以待維新之政、言雖甚拙、意則可嘉、見朝廷擢
臣於久廢之中、謂臣愚必有以少塞其責、或能推
廣上意、惠康小民、而臣天資鈍頑、學問寡淺、心已

耗於多難、才不周其一身、將何以上答聖知、下慰
民願、伏惟太皇太后陛下、以任姒之位、行堯舜之
仁、勤邦儉家、永爲百王之令典、時使薄歛、故得萬
國之歡心、豈煩爨火之微、更助日月之照、但知奉
法不敢求名、

亂免起居舍人第二狀

天威在顏、不違咫尺、父命於子、惟所東西、况茲久
廢之餘、敢有不回之意。中謝伏念臣受性褊狃、賦
命竒窮、既早竊於賢科、復濫登於冊府、多取天下

之公器又處衆人之所爭若此而全從古未有今者出於九死之地始有再生之心危迹粗安驚魂未返若驟膺非分之寵恐別生意外之憂縱無人災必有鬼責伏望聖慈廓天地包函之量推父母愛憐之心知其實出於至誠止欲自處於無過追還新命更選異材使之識分以安身孰與包羞而冒寵再伸微懇伏俟重誅

謝中書舍人表

右史記言已塵高選西垣視草復玷近班皆儒者

之至榮豈平生之所望

中謝

竊以詞命之職古今

所難非獨取之於文蓋將試之以事至於機務亦或與聞雖四戶擅權非當時之公議而五花判事亦前代之美談及夫三字之除乃是一切之政但謂內朝之法從安知宰相之屬官既任止於訓詞故權移於胥史恬不知恠習爲故常先皇帝道冠百王法垂萬世建六官而修故事闢三省以待異人典章一新名實皆正遂申明於四禁俾分領於六曹遠則追直閣之司近則通檢正之任雖未聞

政而聞事、蓋須有德而有言、如臣之愚、無一而可、
草創潤色、既非鄭國之材、除書德音、又乏唐人之
譽、忽當此選、莫測其由此、蓋伏遇皇帝陛下、將聖
與仁、能哲而惠、雖在三年不言之際、已有十日並
照之光、而臣日侍通英、親聞訪道、仰天威之甚近、
知聖鑒之難逃、謂臣嘗受先朝之知、實無左右之
助、棄瑕往昔、責效將來、臣敢不益勵素心、無忘舊
學、上體周公煩悉之誥、助成漢家深厚之文、苟無
曠官、其敢言報、

又表

聖神獨斷、出成命於省中、衰病增光、溢虛名於朝
右、訓詞之重、士論所榮、中謝臣聞有言、逆心此古

人所以顛沛、積毀銷骨、非聖主莫能保全、臣本受
知於裕陵、亦嘗見待以國士、嘉其好直、許以能文、
雖竄謫流離之餘、決無可用、而哀憐收拾之意、終
不少衰、抱弓劍以長號、分簪履之永棄、豈期晚遇、
又過初心、矧外制之深嚴、極西垣之清要、在唐之
盛、以馬周岑文本為得人、近世所傳、有楊億歐陽

修之故事不試而用于今幾人遂超同列之先遠
繼前修之末夫何頑鈍有此遭逢此蓋伏遇太皇
太后陛下憂國忘家愛民如子憂深故任其事者
重愛極故爲之慮也長敷求哲人以遺嗣聖所以
兼收而並用庶幾有得於其間臣敢不盡其所能
期于無愧始終自誓故常以道而事君夷嶮不同
則必見危而授命

謝宣召入院狀

詔語春溫再命而僕使華天降一節以趨在故事

以嘗聞豈平生之敢望省循非稱愧汗交深竊以
視草之官自唐爲盛雖職親事秘號爲北門學士
之榮而祿薄地寒至有京兆掾曹之請豈如聖代
一振儒風非徒好爵之糜兼享大烹之養玉堂賜
篆仰淳化之彌文寶帶重金佩元豐之新渥旣厚
其禮愈難其人而臣以空踈冗散之材衰病流離
之後生還萬里坐閱三遷不緣左右之容躡處賢
豪之上此蓋伏遇皇帝陛下生資文武天胙聖神
雖亮陰不言尚隱高宗之德而訪落求助已啟成

王之心首擇輔臣次求法從知人材之難得采虛名而用臣敢不益勵初心力圖後効才不逮古雖慙內相之名志常在民庶免私人之誚

又

里巷傳呼親臨詔使私庭望拜恭被德音人言稽古之榮臣有素餐之愧懇詞雖至成命莫回伏以朝論所高禁林爲重非徒翰墨之選乃是將相之儲禮絕同僚歎裴李於座上功成異域得頗牧於禁中宜有異人來膺此選而臣顛愚自信狂直不

回先帝憐其孤忠欲召而未果陛下出於獨斷決用而無疑曾未周歲而閱三官試以百爲而無一可保全已幸擢用何名此蓋伏遇太皇太后陛下德協天人心存社稷受聖子之託天下抱神孫而朝諸侯巍巍其有成功不見治迹斷斷而無他技專用老成推其類以及臣顧何能而任此忠義之報死生不移

謝翰林學士表

名微不稱寵至若驚

中謝

伏念臣經術空疎吏能

短淺少年自守無用於作新去國生還適逢於求
舊初何云補遽辱甄收此盖伏遇皇帝陛下文武
生知聰明天縱法乾坤之廣運體日月之照微過
採虛名使陳薄技敢不激昂晚節砥礪初心雖洪
造之難酌盡微生而後已

又表

寵光逾分榮愧交中

中謝

伏念臣本以踈愚起於

遐陋學雖篤志皆場屋之空文言不適時豈朝廷
之通論老於憂患望絕縉紳此盖伏遇太皇太后

陛下總覽政綱灼知治體恢復祖宗之舊兼收文
武之資過錄愚忠以敦薄俗敢不臨寵而懼職思
其憂非敢有意於功名庶幾少逃於罪悔

謝對衣金帶馬表

被三品之服章君子所以昭令德分六閑之駟駿
朝廷所以旌有功顧惟何人亦與茲寵拜恩俯俸
流汗交并

中謝

伏念臣人微地寒性迂才短襲布

韋而自薦偶忝縉紳駕欵段以言歸終安畎畝豈
謂便蕃之錫萃於衰病之軀此盖伏遇皇帝陛下

總覽衆工財成大化至誠樂與有緇衣之好賢俊
民用章無白駒於空谷不遺寒陋亦被光華攬佩
以思遂識斷金之義舉鞭自誓敢忘希驥之心

又表

命服出笥榮動搢紳左驂在廷光生徒馭德不稱
物愧無所容中謝念伏臣衰朽無功蠢愚不學已
分鷄梁之刺敢逃負乘之譏再惟此恩何自而至
此蓋伏遇太皇太后陛下至神廣運盛德兼容躬
周公之勤勞而逸於委任寶老氏之慈儉而侈於

禮賢致此光榮下及微陋慨然攬轡敢有意於澄
清束以立朝尚可言於賓客

謝除侍讀第二表

北門視草已叨儒者之極榮西學上賢復玷侍臣
之高選省循非稱愧汗交懷中謝竊惟講讀之臣
止以言語為職考功課吏無殿最之可書陳善閉
邪有膏澤之潛潤豈臣愚陋亦所克堪此蓋伏遇
太皇太后陛下憂思深長德業久大受先帝投艱
之託為神孫經遠之謀故選左右前後之人罔非

吉士使知興亾治亂之效莫若多聞謂臣雖無大過人之才知臣粗有不欺君之實故使朝夕與於討論奉永日之清閒未知所報畢微生於盡瘁終致此心

謝賜御書詩表

玉笋金尊霈若雲天之澤寶章宸翰煥乎奎璧之文喜溢心顏先生懷袖中謝伏念臣猥緣末技獲玷清流早歲數竒已老江湖之上餘生何幸得依日月之光入侍燕閒與聞講學卒桓榮之業因人

而成登劉洎之床則臣豈敢夫何珍賜亦及微軀此蓋伏遇皇帝陛下道本生知才惟天縱文不數於游夏書已逼於鍾王心慕手追陋文皇之曲學筆縱字大笑宋武之未工知臣遭遇之難欲以顯榮其老鏤之金石庶傳玩於人人付與子孫俾輸忠於世世

謝除龍圖閣學士表

中禁寶儲上應奎璧之象先朝謨訓遠同河洛之符隸職其間省躬非據中謝伏念臣學非有得愚

至不移雖叨過實之名卒無適用之器少時妄意
蓋嘗有志於事功晚歲積憂但欲歸安於田畝屬
聖神之履運荷識拔之非常猶冀桑榆之收遽迫
犬馬之疾力求閑散庶免顛隕豈謂皇帝陛下聖
度包荒天慈委照察其才有所短不欲強置之禁
嚴知其進不由人故特保全其終始遂加此職以
責其行臣敢不仰緣末光益勵素守徃何之而不
可中無愧之爲安但未死亡必期報塞

又表

北扉清密久愧素餐內閣深嚴復膺殊寵以榮爲
懼有覲在顏中謝伏念臣賦命數竒與人多忤遭
遇聖祖忝竊賢科繼蒙英廟之深知尤荷裕陵之
見器而流離若此窮薄可知晚親日月之光常恐
餅壘之溢故求閑散以避災屯豈謂太皇太后陛
下天高聽卑坤厚載物愛惜臣下固無異於子孫
委任官師本不分於中外致茲衰病不失清華然
臣辭寵而益榮求閑而得劇雖云稍遠於爭地尚
恐終非其久安敢不磨鈍自修履冰知戒庶全孤

節少答殊私

謝賜對衣金帶馬表

出笥之珍，已華朽質。解駮之賜，益耀衆觀。顧惟何人，亦被茲寵。中謝伏念臣少而拙訥，老益踈愚。山野之姿，非文繡之所及。疲駑之質，雖鞭策以何加。方祈冗散之安，更忝便蕃之錫。此蓋伏遇皇帝陛下，緝熙儒術，網羅人材，不愛車服，寵數之章，使爲吏民瞻望之表。據鞍有愧，束衽知榮。敢不奉以牧民，永思去害之指。施之大邑，庶無學製之傷。

又表

命服斯皇，詩詠周宣之德。康侯用錫，易稱王母之仁。惠澤所加，臣工知勸。中謝伏念臣資材朽鈍，學術空踈。矧茲衰病之餘，豈復光華之美。荷寵章之蕃庶，人以為榮。顧形影之支離，臣惟自愧。此蓋伏遇太皇太后陛下，知人堯哲，徧物舜仁。時遣拾遺補過之臣，出爲承流宣化之任。子衣安吉，不待請而得之。我馬虺隤，蓋知勞而賜者。敢不勉思忠蓋，務報恩勤。求惟廩庫之珍，莫非民力。無忘獄市之

寄以副上心

杭州謝上表

始衰而病。豈非滿溢之災。乞越得杭。又過平生之望。中謝伏念臣起自廢黜。驟登禁嚴。畢命驅馳。未償萬一。懷安退縮。豈所當然。蓋散材不任於斧斤。而病馬空縻於芻粟。故求外補。以盡餘年。豈期避寵而益榮。求閑而得劇。此蓋伏遇皇帝陛下。剛健中正。緝熙光明。無爲蓋虞舜之仁。篤學有仲尼之智。而臣猥以末技。日奉講帷。凜然威光。近在咫尺。

惟古人責難之意。每不自量。方陛下好問之初。遽以疾去。推之理數。可謂竒窮。荷眷遇之不移。竊恩榮而愈重。雖雨露之施。初不擇物。而犬馬之報。期於殺身。

又表

入奉禁嚴。出膺方面。皆人臣之殊選。在儒者以尤

榮

中謝

伏念臣受寵逾涯。積憂成疾。旣思退就。於安養。又欲少逃於滿盈。仰荷至仁。曲從微願。江山故國。所至如歸。父老遺民。與臣相問。知朝廷輟近

侍爲太守。蓋聖主視天下如一家。鞭扑未施。爭訟幾絕。臣之厚幸。豈易名言。此蓋伏遇太皇太后陛下。天地之仁。賢愚兼取。日月之照。邪正自分。每包函其蠢迂。欲保全其終始。兄弟孤立。嘗親奉於德音。死生不移。更誓堅於晚節。

杭州謝放罪表

職在承宣。當遵三尺之約束。事關利害。輒從一切之便宜。曲荷天慈。不從吏議。中謝伏念臣早緣剛拙。屢致憂虞。用之朝廷。則逆耳之奏。形於言施之

郡縣。則疾惡之心。見於政。雖知難。每以爲戒。而臨事不能自回。苟非日月之明。肝膽必照。則臣豈惟獲罪於今日。久已見傾於衆言。恭惟皇帝陛下。睿哲生知。清明旁達。委任羣下。退託於不能愛養成材。惟恐其有過。知臣欲去一方之積弊。須除二猾。以示民特屈憲章。以全器使。臣敢不省循。過咎祇服。簡書眷此。善良自不犯於漢法。時有貸捨。用益廣於堯仁。

又表

亂羣之誅不請而決蓋恩威之無素致姦猾之敢
行方俟譴訶豈期寬宥中謝伏以法吏綱密蓋出
於近年守臣權輕無甚於今日觀祖宗信任之意
以州郡責成於人豈有不擇師帥之良但知繩墨
之馭若平居僅能守法則緩急何以使民顧臣不
才難以議此恭惟太皇太后陛下寬仁從衆信順
得天推一身之至公納萬方於無罪而臣始終被
遇中外蒙恩謂事有專而合宜情無他而可恕故
加貸捨以示寵綏朝廷之明粗以臣爲可信吏民

自服當不令而率從

謝賜曆日詔書表

論道調元雖大臣之職授時賦政亦郡守之常而
臣供奉內朝使指一道居則代言而頒令出則勸
民以務農蒙此恩榮敢忘奉順中謝恭惟皇帝陛
下文明憲古睿哲先天歷象教民本堯舜之智水
旱罪已蓋禹湯之仁固將推廣其誠心豈特奉行
於故事爰因歲首已宣布於王言孰謂民愚咸識
知於帝力

又表

竊惟稽古之君、必以授時為急、底日不失、日官既
有常、先時不及、時罰在無、赦申以丁寧之詔、致其
惻怛之誠、習見頒行、止謂有司之故事、考其情實、
則本聖人之用心、中謝恭惟太皇太后陛下元功
在天、盛德冠古、順帝之則、雖並用於恩威、與物為
春、蓋同歸於仁厚、而臣入奉講學、出牧農民、恭布
詔書、悉傳閭里、庶德音之昭格、致嗣歲之農穰、

謝御膳表

問其治療之增損、督以朝參之日辰、中謝臣丁履
淵冰、上負芒刺、蹄涔雖小、能延兩耀之光、寸草何
知、莫報三春之澤、正使豚魚幽陋、木石堅頑、亦將
激勵、忘軀奔走、赴職而臣尚有無厭之請、敢守不
移之愚、在法當誅、原情可憫、實以負薪之疾、積有
歲時、勿藥之祥、恐非旦夕、終願江淮之一郡、以安
犬馬之餘生、尚冀此身未填溝壑、期於異日、別効
涓埃、

上皇帝賀冬表

易稱來復、蓋知天地之心、禮戒無爲、以待陰陽之
定。中謝恭惟皇帝陛下、堯仁克古、舜孝通神、種德
兆民、躬行文景之儉、游心六藝、灼知周孔之情人、
旣和而歲自豐、天不違而壽無極、臣以緣衰病待
罪江湖、莫瞻北極之光、但罄南山之祝。

辭免翰林學士承旨第一狀

念臣頃以兩目昏暗、左臂不仁、堅辭禁林、得請便
郡、庶緣靜退、少養衰殘、二年于茲、一事無補、才有
限而難強、病不減而益增、但以東南連被災傷、不

敢陳乞、別求安便、敢謂仁聖尚賜恩憐、召還故官、
復加新寵、不惟朝廷公議未允、實亦衰病勉強不
前、兼竊覩邸報、臣第輒已除尚書右丞、兄居禁林、
弟爲執政、在公朝旣合迴避、於私門實懼滿盈、計
此誤恩、必難安處。

第二狀

臣以衰病不才、難居禁近、兼以第輒忝與執政、理
合回避、奏乞除臣一郡、今奉詔書、未賜開允、恩威
之重、需若雷雨、豈臣孱陋所敢固違、伏念臣自去

闕庭日加衰白、故疾不愈、舊學已荒、更冒寵榮、必
速顛躓、而况清要之地、衆所奔趨、兄弟迭居、勢難
安處、正使緣力辭、而獲譴、猶賢於忝冒、而致災、

謝宣召再入學士院第一狀

使星下燭、生蓬華之光華、天澤旁流、失桑榆之枯
槁、國有用儒之盛、士知稽古之榮、伏以翰墨之林、
號稱內相、文章之外、不取他才、至於用人、可以觀
政、文武並用、或成頗牧之功、邪正襍居、至有伍文
之患、惟貴且近、故難其人、而况金鑿玉堂、親被絲

綸之密、北廳東閣、獨稱年德之高、必有其人、以齊
衆口、而臣本緣衰病、出守江湖、以一方凋弊之餘、
當二年水潦之厄、戴星而治、僅免流離、及瓜而還、
恍如夢寐、交親迎勞、都邑聚觀、驚華髮之半空、笑
丹心之未折、宜投閑散、以養衰殘、豈期過採於虛
名、復使榮加於舊物、此盖伏遇皇帝陛下、德如乾
健、明配日中、既祖述於堯仁、復躬行於舜孝、才難
之歎、人誦斯言、緣先帝之德音、收孤臣於散地、言
雖直而無罪、身愈遠而益親、委曲保全、始終錄用、

臣敢不更磨朽鈍、少補涓埃、難得者時、未有捐軀之會、勿欺而犯誓、無患失之心。

第二狀

衰遲無用、寵既溢於當年、眷待有加、恩復隆於晚節、使華臨賁、天語丁寧、聳里巷之驚觀、歎朝廷之用舊、伏以禁林分直、法本六人、帝語親承、舊惟一老、不緣名次之先後、斷自上心之簡求、冠內朝供奉之班、極儒者遭逢之盛、凡膺此選、宜得異材、而臣本以愚忠、累塵器使、初無已試之效、但有過實

之名、千里關、慶二年、江海憂深、投杼豈無三至之言、詔復賜環、不待一人之譽、此蓋伏遇太皇太后陛下、道無私載、公生至明、以七年之照臨、觀羣臣之邪正、知臣剛褊自用、雖有寬饒之狂察、臣招麾不移、庶幾長孺之守、故還舊物、益茂新恩、臣敢不早夜以思、死生不易、雖桑榆之景已迫、殘年而犬馬之心、猶思後效。

謝賜對衣金帶馬狀

漢官三服、已分密麗之珍、唐監八坊、復下權奇之

駿拜嘉甚寵省已何功伏念臣受材迂疎賦命寒
蹇幼師季路止服緼袍長慕少游欲乘下澤目眩
重金之耀神驚四牡之長俛仰自惟周章失次此
盖伏遇皇帝陛下憂勤黎庶寤寐雋賢故損廩庫
之儲以廣英雄之毅致茲孱陋亦被寵光臣敢不
求稱于衷益鞭其後薄德盛服當戒維鷄之篇強
力安邦庶幾有駉之頌

又狀

鏤錫金軛示有馳驅之勞寶帶襲衣豈無約束之

義上既循名而責實下當因物以貢誠伏念臣少
則賤貧長而困阨仲卿龍具追晏子之一裘伯厚
雞栖陋景公之千駟無功拜賜服寵汗顏顧惟何
人膺此異數此盖伏遇太皇太后陛下躬行慈儉
德貫天人約於奉已而侈於養賢嚴於私親而寬
於馭衆憐其朽鈍借以光華臣敢不衣被訓詞服
勤鞭箠惟德其物永觀不易之言思馬斯徂更厲
無邪之志

謝兼侍讀表

叨承新命、祇服訓詞、薄技已窮、舊恩未替。中謝伏
念臣志大而才短、論迂而性剛、以自用不回之心、
處衆人必爭之地、不早退縮、安能保全。是以三年
翰墨之林、屢遭飛語、再歲江湖之上、粗免煩言。豈
此身愚智之殊、蓋所居閑劇之致。臣之自處何者、
爲宜而况講讀之司、惟幄最近、分章摘句、則何以
報非常之知、因事獻言、又必貽前日之患。雖仰恃
天目之照、實常負冰淵之虞。恭惟皇帝陛下大德
庇民、小心順帝、雖天覆地載、以聖不可知爲神、而

日就月將、以學而不厭爲智、曲收舊物、以廣多聞。
臣敢不職思其憂、本無分於中外、欲報之德、誓不
易於死生。

又表

用非其分、寵至若驚、蒲溢之憂、逡巡莫避。中謝伏
念臣與第轍同登進士、並擢賢科、內外分掌於制
書、先後迭居於翰苑。今臣以經史入侍、司言行于
中、轍以丞轄立朝、督綱條於外、恭承明詔、不許固
辭、以爲兄弟之同升、自是朝廷之盛事。承明三入

僅比古人大雅一門無慙舊史人非木石恩重丘
山恭惟太皇太后陛下明極照臨憂深付託欲爲
社稷之衛莫如臣僕之賢以帝堯之哲而甚畏於
壬人以孔子之聖而思見於狷者致茲選擇驟及
迂愚臣敢不淬厲初心激昂晚歲誓堅必死之節
少報不貲之恩

陶石簣先生批選唐宋六家表啟

宋眉山蘇軾子瞻

謝三伏早休表

大火既中三庚云伏炎熹之病貴賤所同忽蒙退
食之恩遂失流金之酷中謝恭惟皇帝陛下仁均
動植明燭幽微上有無逸之勤下無獨賢之歎臣
等逢時多暇竊祿安居共揚扇暍之風以安黎庶
更勵飲冰之節少答生成

又表

火星見而金微日方可畏朝氣銳而晝情恩獲少
休上既知勞下皆忘暑中謝恭惟太皇太后陛下
勞謙恭已內恕及人雖天地無一物之私而父母
有至誠之愛臣等仰蒙寬假動獲便安未明無顛
倒之衣省循何幸夙退有委蛇之食歌詠而歸

謝除龍圖閣學士知潁州表

備員經席幸依日月之光引避親嫌實有簡書之
畏恩還舊職寵寄近蕃衰朽增華省循知愧中謝
伏念臣生無他技天與愚忠雖所向之奇窮獨受

知於仁聖力求便郡蓋常懷老退之心伏讀訓詞
有不爲朕留之語殊私難報危涕自零恭惟皇帝
陛下緝熙光明剛健篤實方收文王之四友以集
孔子之大成而臣苟念餘生之安莫伸一割之用
桑榆暮齒恐遠齋志而莫償犬馬微心猶恐蓋棺
而後定

又表

引嫌求避顧舊典之甚明易職寵行荷新恩之至
厚疎愚自省慙悚交并中謝伏念臣學陋無聞性

迂難合受四朝之知遇、竊五郡之蕃宣、吳會二年、
但坐糜於廩祿、禁林數月、曾未補於絲毫、敢異殊
私復還舊物、恭惟太皇太后陛下、仁涵動植、明燭
幽微、知臣獨受於聖知、欲使曲全於晚節、憐其無
用、許以少安、凡力請八章、而後從、使不爲一乞、而
遽去、在臣進退、可謂光榮、雖老病懷歸、已功名之
無望、而衷誠思報、尚生死之不移、

謝賜對衣金帶馬狀

錫之上駟、敢忘致遠之勞、佩以良金、無復忘腰之

適執鞭請事、顧影知慙、恭惟皇帝陛下、禹儉中修、
堯文外煥、長轡以御、卒皆四牡之良、所寶惟賢、豈
徒三品之貴、出捐車服、收輯事功、而臣衰不待年、
寵常過分、枯羸之質、匪伊垂之、而帶有餘、歛退之
心、非敢後也、而馬不進、徒堅晚節、難報深恩、

又狀

出笥之珍、以旌有德、在堦之駟、豈及無功、而臣首
尾四年、功塵三錫、省躬內灼、服寵汗流、恭惟太皇
太后陛下、慈儉自居、龍光四達、德被海宇、豈惟一

襲之衣恩結華夷何止十圍之帶羣賢在馭六轡
自調而臣頃以衰羸止求安便奉宣德意庶幾五
袴之謠收歛壯心無復千里之志更期力報有愧
空言

穎州謝到任表

避嫌引疾慙無國士之風揣分知難粗守人臣之
節曲蒙溫詔遂假名邦已見吏民惟知感怍
伏念臣早緣多難無意軒裳晚以虛名偶塵侍從
雖云時可每與願違既未決於歸田故力求於治

中謝

郡慈母愛子但憐其無能明君知臣終護其所短
自欣投老漸獲安身此蓋伏遇太皇太后陛下慈
儉臨民剛柔布政叅天地而有信喜怒不陳體水
鏡之無心忠邪自辨致茲愚直亦克保全雖任職
居官無過人者而見危授命蓋有志焉

又表

支郡責輕未卽蒲盈於小器豐年事簡非徒飽暖
於一家覽几席之溪湖雜簿書於魚鳥平生所樂
臨老獲從

中謝

伏以汝穎爲州邦畿稱首土風備

於南北人物推於古今賓主俱賢蓋宗資范孟博
之舊治文獻相續有晏殊歐陽修之遺風顧臣何
人亦與茲選此蓋伏遇皇帝陛下丕承六聖摠攬
羣英生知仁孝之全學識文武之大謂臣簪履之
舊物嘗忝帷幄之近臣奉事七年崎嶇一節意其
忠義許國故暫召還察其老病畏人復許補外置
之安地養此散材更少勉於桑榆誓不忘於畎畝

上清儲祥宮成賀德音第二表

琳館告成神人交慶綸音下霈過故盡除中賀臣

聞漢武築通天之臺魏明作凌雲之觀皆厲民而
私已或秘祝以斬年然猶形於詠歌被之金石而
况文孫繼志神母考祥追六聖之心本枝百世均
萬方之慶囹圄一空豈惟洗濯於丹書固已光華
於青史恭惟皇帝陛下知人堯哲克已禹勤積德
之宮以文章爲藻飾庇民之厦以仁義爲基扃眷
樸斲之成能亦聖人之餘事臣久叅法從夙侍經
幃樂石銘詩雖幸執太史之筆大圭薦裸不獲踐
屬車之塵徒與吏民共茲慶澤

賀駕幸太學表

輦回原廟、旣崇廣孝之風、幄次儒宮、復示右文之化、禮行一日、風動四方、中賀臣聞五學之臨、三代所共、蓋天子不敢自聖、而盛德必有達尊、在漢永平始舉、是禮雖臨、雍拜老有先王之規、而正坐自講、非人主之事、豈如先哲退託、不能奠爵、伏興意默、通於先聖、橫經問難、言各盡於諸儒、恭惟皇帝陛下、文武憲邦、聰明齊聖、大度同符於藝祖、至仁追配於昭陵、爰舉舊章、以興盛節、臣早塵法從、久

侍經帟、永矣馳誠、想聞合語於東序、斐然作頌、行觀獻馘於西戎。

又表

濟濟多士、靈承上帝之休、雍雍在宮、服膺文母之教、風傳海宇、慶溢臣工、中賀臣聞學校太平之文、而以得士爲實、經術致治之具、而以愛民爲心、心旣立而具乃行、實先充而文斯應、永惟坤載之厚、輔成天縱之能、惟使文子文孫、莫不仁故於先聖、先師無所愧恭、惟太皇太后陛下、憂深祖構、德燕

孫謀黃裳之文斧藻萬物青衿之政長育羣材豈
惟鼓舞於士夫實亦光華於史冊臣冒榮滋久被
遇最深外告成功行喜鴉音之革中修潛德孰知
麟趾之風

謝賜曆日表

迎日推筭雖曰百王之常後天奉時惟我二后之
德伏讀詔旨灼知聖心中謝伏以嗣歲將興舊章
畢舉三朝受海內之圖籍七月陳王業之艱難冬
有祁寒知民誠之可畏陽居大夏識天道之至仁

故於頒朔之初更下布新之詔恭惟太皇太后陛
下視民如子以國爲家振廩勸分人自忘於艱歲
消兵去殺天必報之豐年臣敢不省事清心貴農
時之不奪思患預備期歲計之有餘庶竭微誠少
裨洪造

揚州謝到任表

支郡養痾裁能免咎通都移牧自愧何功屢玷恩
榮實深慙汗中謝伏念臣早緣竊祿稍習治民在
先帝日已歷三朝近八年間復忝四郡平生所願

蒲足無餘志大才疎信天命而自遂人微地重恃
聖眷以少安恭惟太皇太后陛下子惠萬民器使
多士以謂朝廷之德澤付於郡縣與監司乃眷江
淮之間久罹水旱之苦隣封二浙飢疫相薰積欠
十年豐凶皆病臣敢不上推仁聖之意下盡疲駑
之心庶復流亡少寬憂軫

又表

一麾出守方愧媮安十國爲連復膺寵寄恩榮旣
溢慙汗靡寧中謝伏念臣本以鯁生冒居禁從頃

緣多病力求頽尾之行曾未半年復有廣陵之請
蓋以魚鳥之質老於江湖之間習與性成樂居其
舊天從民欲許擇所安恭惟皇帝陛下欽明文思
剛健純粹天功默運灼知萬化之情人材並收各
取一長之用如臣衰朽尚未遐遺命至蹇而祿已
盈每懷憂懼志雖大而才不副莫報恩私

謝賜卹刑詔書表

時令舉行雖云故事天心惻怛本出至誠德旣洽
於好生民雖死而無憾中謝伏以刻木畫地志士

不居鑠石流金平人猶病宜軫聖神之念實爲哀
敬之先訓誥丁寧吏民感動恭惟皇帝陛下禹湯
罪已堯舜性仁以不忍人之心行若稽古之政豈
止緩獄實期無刑臣敢不推廣上恩厚風俗於無
犯申嚴法意消盜賊於未萌少假歲時庶空囹圄
又表天也無戰以秋萬外之計人林並外各
暑雨其咨旣軫小民之病麥秋已至復虞輕繫之
淹祗服訓詞灼知天意中謝伏以仁聖之德哀矜
爲先常內恕以及人故深居而念遠齊戒處掩則

知暴露之勤紵絺裨延不忘纍繼之苦吏旣罔懈
民知無冤恭惟太皇太后陛下事法祖宗德參天
地凱風養物散爲扇暘之涼靈雨應時同沾執熱
之濯臣敢不盡其哀敬濟以寬明奉漢律之嚴母
令瘦歿推慈母之意務在持平

賀立皇后表

續女維莘倪天之妹事關廟社喜溢人神中賀臣
聞三代之典皆有內助二南之化實本人倫維關
睢正始之風具旣醉太平之福民有所恃邦其永

昌恭惟皇帝陛下自誠而明、惟睿作聖、輯寧夷夏、
德既茂於治朝、輔順陰陽、政兼修於內職、既膺大
慶、益廣至仁、下逮海隅、夫婦無有愁歎、上符天造、
日月爲之光明、受祿無疆、與民同樂、

又表

吉日既涓、柔儀允正、穀珪往聘、象服來朝、中賀臣
聞周姜任嬖之賢、位非皆極、漢陰馬鄧之貴、德或
有慙、盛哉六禮之陳、襲此三宮之慶、恭惟太皇太
后陛下任付託之重、躬保佑之勞、公天下不私其

親配宸極、必先以德、徽音不墜、嗣成慈孝之風、仁
壽無疆、坐享雲來之養、

謝除兵部尚書賜對衣金帶馬狀

盛服在躬、無復曳婁之歎、名駒出廐、遂忘奔走之
勞、施重丘山、身輕毫末、伏念臣少賤而鄙性、稚少
文衣敝緼袍、未嘗有耻、乘款段馬、自以爲安、豈意
晚年屢膺此寵、此盖伏遇皇帝陛下紹隆景命、摠
攬羣英、無競維人、勢已加於九鼎、惟德其物、恩有
重於千金、臣敢不上體眷懷、勉思報稱、贈繞朝之

策愧不能謀振屈原之衣期於自潔
又狀
伏以在笥之珍本出於民力脫驂之賜以結於士
心顧臣何人屢膺此寵伏念臣學本爲已材不適
時乘伯厚之車雖云疾惡束公西之帶愧不能言
而二年之間三拜是賜此蓋伏遇太皇太后陛下
心存社稷德協天人以長策駕馭四方以盛德藩
飾多士故令衰朽猶玷光華豈曰無衣蓋獨求於
安吉慨然攬轡敢有志於澄清

謝兼侍讀表

重地隆名不擇所付清資厚祿以養不才
念臣以草木之微當天地之澤七典名郡再入翰
林兩除尚書三忝侍讀雖當世之豪傑猶未易居
矧如臣之孤危其何能副恭惟皇帝陛下聖神格
物文武憲邦重離繼明何煩爝火之助大厦旣構
尚求一木之支而臣白首復來丹心已折望西清
之帷幄久立傍徨聞長樂之鼓鐘恍如夢寐莫報
丘山之施猶貪頃刻之榮

謝賜對衣金帶馬狀

服官莫能響動佩章圉士効牽光生韉策伏以三
賜之重莫隆於車馬五采之貴兼施於衣裳汝必
有功服之無斃而臣衰年弱幹固難強於馳驅枯
木朽株本不願於文繡寵加意外愧溢顏間此蓋
伏遇皇帝陛下因能任官稱物平施操名器以勵
士上有誠心正銜勒以馭人下無遺力臣敢不思
稱其服益勵厥躬雖愧立朝乏能言之近用猶希
辨道輸老智於暮年

又狀

服章在笥賁及衰殘銜勒過庭喜先徒御伏以物
生有待天施無窮草木何知冒慶雲之渥采魚鰕
至陋借滄海之榮光雖若可觀終非其有妻孥相
顧驚屢致於匪頒道路竊窺或反增於指目此蓋
伏遇太皇太后陛下聰明齊聖陳錫載周含垢匿
瑕而察於求賢卑宮菲食而侈於養士士豈輕於
千里念非其人言有重於兼金當思所報

定州謝到任表

兵民重寄，本禦侮以折衝，疆場久安，但坐嘯而畫諾。才微祿厚，恩重命輕。中謝伏念臣一去闕庭，三換符竹，坐席未暖，召節已行。筋力疲於往來，日月逝於道路，未經周歲，復典兩曹。朝廷非不用臣，愚慙自不安位，所宜竄逐，更冒寵榮。此蓋伏遇皇帝陛下，離明正中，乾健獨運，追述東朝之遺意，收此散材，眷言西學之舊臣，付之善地，致此衰朽，尚未棄捐。臣敢不勤卹民勞，密修邊備，苟無大過，以及暮年，漸還魚鳥之鄉，以畢桑榆之景。

慰宣仁聖烈皇后山陵禮畢表

日月有時，義當卽遠，兩露旣降，思則無窮。遙知穆穆之光，尚起皇皇之望。中謝恭惟皇帝陛下，道循

祖武，德契天心。大哉孔子之仁，泫然流涕至矣。顯宗之孝，夢若平生。願寬舜慕之心，少副堯封之祝。慰宣仁聖烈皇后祔廟禮畢表

反寢而虞，旣盡飾終之典。宅神于廟，益隆追遠之思。凡在照臨，舉增悲慕。中謝竊以六朝繼聖，並傳家法之餘。三后御簾，高出古人之右。逮此登配，廓

然永懷恭惟皇帝陛下奉順母慈表章坤德四謚
哀榮之詔簡策有光數詩輓餞之音道塗垂涕日
月云遂典禮告成願寬無益之悲少副有生之望

謝賜衣襖表

齊官三服已寬卒歲之憂漢札十行更佩先春之
煖恩均吏士聲動華夷

中謝

伏以禮著始裘詩歌

無褐邊陲更戍本爲臣子之常朔易早寒特軫聖
神之念惟德其物豈日無衣恭惟皇帝陛下廣運
聰明力行恭儉威風旁振方戰栗於天驕溫詔下
融遂流澌於河凍旣無功而坐食實有愧於解衣
敢不推廣朝廷之仁益收凍餒申嚴祖宗之法少
肅情媮庶收汗馬之勞以解濡鵝之誚

到惠州謝表

仁聖曲全本欲畀之民社羣言交擊必將致之死
亡尚荷寬恩止投荒服

中謝

伏念臣性資褊淺學

術荒唐但信不移之愚遂成難赦之咎迹其狂妄
久合誅夷方尚口乃窮之時蓋擢髮莫數其罪豈
謂天幸得存此生此蓋伏遇皇帝陛下以大有爲

之資行不忍人之政湯網開其三面舜干舞於兩階念臣奉事有年少加憐愍知臣老成無日不足誅鋤明降德音許全餘息故使虺虺之馬猶獲蓋惟齮棘之牛得違刀几臣敢不服膺嚴訓託命至仁洗心自新沒齒無怨但以瘡癘之地魑魅爲鄰衰疾交攻無復首丘之望精誠未泯空餘結草之忠

到昌化軍謝表

並鬼門而東驚浮漳海以南遷生無還期死有餘

責中謝

伏念臣頃緣際會偶竊寵榮曾無毫髮之能而有丘山之罪宜三黜而未已跨萬里以獨來恩重命輕咎深責淺此蓋伏遇皇帝陛下堯文炳煥湯德寬仁赫日月之照臨廓天地之覆育譬之蠕動稍賜矜憐俾就窮途以安餘命而臣孤老無託瘡癘交攻子孫慟哭於江邊已爲歿別魑魅逢迎於海上寧許生還念報德之何時悼此心之永已俯伏流涕不知所云

提舉玉局觀謝表

七年遠謫不自意全萬里生還適有天幸驟從縲
繼復齒縉紳中謝伏念臣才不逮人性多忤物剛
褊自用可謂小忠猖狂妄行乃蹈大難皆臣自取
不敢怨尤會真人之勃興與萬物而更始而臣獨
在幽遠最爲冥頑迨茲起廢之初倍費生成之力
終蒙記錄不遂棄捐此蓋伏遇皇帝陛下正位龍
飛對時虎變神武不殺豈非受命之符清淨無爲
坐獲消兵之福聰明不作邪正自分使臣得同草
木之微共霑雷雨之解臣敢不益堅素守深念往
愆沒齒何求不厭飯蔬之陋蓋棺未已猶懷結草
之忠

答杭州交代啟

伏審知府鈐轄待制新易節旄光臨督府舊政已
孚於千里先聲坐振於七州某偶以庸愚適相前
後愧無毫髮之善可紀斯民惟有凋瘵之餘以遺
君子卽諧瞻奉尤切詠思

答館職啟

伏審奉詔明庭陞華冊府國有得賢之慶士知稽

古之榮、虎觀石渠、極諸儒之妙選、鼇宮金闕、笑方
士之遠來、自喜衰年、獲觀盛事、某官學本自得道、
惟造深、溫故爲君子之儒、多聞推益者之友、奇字
可學、知子雲之苦心、亡書復存、賴安世之默識、不
試而用、知賢則深、某方此賜環、遽承枉駕、沐誨音
之已厚、愧馳謁之未遑、

潁州到任謝執政啟

入。叅。兩。禁。每。玷。北。扉。之。榮。出。典。二。邦。輒。爲。西。湖。之。
長。皆。綠。天。幸。豈。復。人。謀。惟。汝。水。之。名。邦。乃。裕。陵。之。

故國人淳事簡地壤泉甘豈惟暫養於不才抑亦
此生之可老恭惟某官嘉猷經世茂德範時元老
廟堂自有權衡之信餘生江海得同品物之安感
佩之私筆舌難旣

與京西運使劉昱啟

衰病倦游久懷歸意聖神寬假特乞守符條教濶
疎溪湖清遠但坐糜於廩祿顧難繼於賢豪所幸
仁明曲垂鎮撫特先蒙於顧盼使增重於吏民伏
惟運使郎中才簡上心名高省戶暫屈外臺之寄

一蘇右輔之民日望車塵按臨封部少奉誨言之
末足爲衰朽之光感佩之私筆舌難旣

揚州到任謝執政啟

擇地而安本非臣子之達節有求必獲足見廟堂
之兼容釋汝潁之清閑當江淮之衝要舊游所樂
習俗相諳已見吏民具述朝廷之意不爲條教自
然獄市之清此蓋伏遇某官師保斯民著龜當代
折衝禦侮已獲萬人之英補隙輔疎更收一木之
用某敢不益求民瘼勉盡鄙才但未歸田之須臾

猶思報國之萬一

賀彭發運啟

伏審拜詔十行觀風六路允符公論克振先聲恭
承曩契之隆得與屬城之末瞻依有素感慰居多
伏惟發運吏部年兄士聳英風時推舊德用火淹
而未盡才歷試而愈高舡滿潭中行奏韋堅之課
錢流地上佇觀劉晏之能喜抃之深力占難盡

定州到任謝執政啟

燕南趙北昔稱謀帥之難尺短寸長今以乏人而

授幸此四夷之守忘其一障之乘坐食何功捫心
知愧伏念某愚忠自信朴學無華孔融意廣才疎
訖無成效嵇康性褊傷物頻致怨憎叨逢聖世之
休明未分昔人之憂患故求散地以養衰年終成
命之莫回悼此心之未亮伏惟某官躬行周孔力
致唐虞燮和天人方遂萬物之性虛受海宇固容
一介之微眷此餘生實無他望老如安國旣倦北
平之遷惹比方回終有會稽之請歸依之至筆舌
難周

謝諸郡啟

燕南趙北昔爲百戰之場地人和今乃四夷之
守觀累朝之命帥皆一代之名臣豈謂寵榮曲加
疲陋顧吏民之易治幸衰拙之少安此盖伏遇某
官顧德庇民宏才緯世餘膏所燭常分無盡之光
蒙霧而行坐獲不知之潤眷言朽鈍未遂顛擠勉
加榮勵之勤少答吹揚之賜

夏良答丁連州啟

七年遠謫不知骨肉之存亾萬里生還自笑音容

之改易久恬颺霧稍習蛙蛇自疑本儋崖之人難
復見魯衛之士而况清時雅望令德高標固已聞
名而自慙蓋欲通書而未敢豈謂知郡朝奉仁無
擇物義有逢時每憐遷客之無歸獨振孤風而愈
厲固無心於集苑而有功於噓枯遠移一紙之書
何啻百朋之錫過情之譽雖知無其實而愧于中
起廢之文猶欲借此言以華其老窮途易感永好
難忘

答陳提刑啟

久竄島夷偶未書於鬼錄逃歸空谷固喜聞於足
音况清廟瑚璉之姿爲明堂杞梓之用欲聞名而
未敢豈流問之或先恭惟提刑刑部才高一時望
重多士魯諸儒之德業綠飾政刑漢循吏之風流
本源經術暫屈雲霄之步一蘇嶺嶠之民憐遷客
之無歸墜尺書而起廢助其羽翼借以齒牙但憂
枯朽之餘難副吹噓之力旣感且忤不知所云

答彭賀州啟

竄流海國脫身羈鬼之林洒掃真祠拜賜散人之

號喜歸田之有漸悼報國之無期方自愧於心顏
敢聞名於左右豈謂某官曲敦雅好深軫窮途賜
以尺書借之餘論温詞曲盡賢於十部之見臨陋
質增華果已五漿之先餽但慙衰朽虛辱品題敬
佩至言永以爲好

答王承議啟

泮水受成繆膺桑梓之敬海邦畫諾又觀枳棘之
栖多難百罹流年半世恍如昨夢復見故人伏惟
知郡承議居以才稱進由德選淵源師友舊仰鄭

公之高歌詠風流近傳邵父之繼不忘疇昔曲賜
拊存豈獨憐衰朽而借餘光盖將敦風義以勵世
俗感佩之至筆舌難周

答王幼安宣德啟

俯仰十年忽焉如昨間關百罹何所不有頃者海
外澹乎盖將終焉偶然生還置之勿復道也方將
求田問舍爲三百指之養杜門面壁觀六十年之
非豈獨江湖之相忘盖已寂寥而喪我不謂某官
講修舊好收錄陳人粲然雲漢之章被此枯朽之

質欲其洗濯宿負、激昂晚節、粗行平生之志、少慰朋友之望、此意厚矣。我心悠哉，如焦穀牙如伏櫪馬，非吹噓之所及，縱鞭策以何加，藏之不忘，永以為好。

賀楊龍圖啟

伏審新改直職、擢司諫垣、傳聞邇遐、竦動觀聽、咸謂國家之鉅福、乃用諫諍之真才、必能深言以補大化、方今朝廷之上、號為無諱、而太平之美、終不能全、臺諫之列、歲不乏人、而衆弊之原、猶或未去。

豈聽之者徒能容而不能用、言之者但為名而不為功、歷觀古人之效忠、皆因當世而用智、不務過直、期於必行。右尹子革因墳典而道祈招之詩、左師觸龍語饘粥而及長安之質、徒盡拳拳之意、不求赫赫之名。此仁人及物之休功、忠臣愛君之至分。伏自頃歲、所更幾人、席未暖而輒遷、踵相躡而繼去、一身之譏、固足以免矣、而積歲之病、當使誰去之。恐習慣以為常、遂因循而不振。雖在僻陋、顧常隱憂、以為必得朴忠憂國之人、而又加以辯智。

得君之術言苟獲用國其庶幾伏惟諫院龍圖才
雄於世而常若不勝節過於人而未嘗自異素練
邊事深知兵驕頃持銓衡實識官冗必將舉大體
而不論小事務實效而不爲虛名某最蒙深知愧
無少補方傾耳以聽願續書諫苑之篇若有待而
言或能著爭臣之論阻以在外無由至門踴躍之
懷實倍倫等

賀歐陽少師致仕啟

伏審抗章得謝釋位言還天眷雖隆莫奪已行之

志士流太息共高難繼之風凡在庇庥共增慶慰
伏以懷安天下之公患去就君子之所難世靡不
知人更相笑而道不勝欲私於爲身君臣之恩係
縻之於前妻子之計推荷之於後至於山林之士
猶有降志於垂老而况廟堂之舊欲使辭福於當
年有其言而無其心有其心而無其決愚智共蔽
古今一塗是以用捨行藏仲尼獨許於顏子存亡
進退周易不及於賢人自非智足以周知仁足以
自愛道足以忘物之得喪志足以一氣之盛衰則

孰能見幾禍福之先。脫屣塵垢之外。常恐茲世不見其人。伏惟致政觀文少師全德難名巨材不器。事業三朝之望。文章百世之師。功存社稷而人不。知躬履艱難而節乃見。縱使耄期篤老猶當就見。質疑而乃力辭於未及之年。退託於不能而止。大勇若怯。大智如愚。至貴無軒冕而榮。至仁不導引而壽。較其所得孰與昔多。某受知最深。聞道有自。雖外爲天下惜。老成之去而私喜。明哲得保身之全。伏暑向闌。台候何似。伏冀爲時自重。少慰輿情。

謝監司薦舉啟

猥以庸虛。過蒙知遇。旣免尤譴。復加薦論。自省孤危。加之衰病。生而賦朴。野之性愚。不識禍福之機。但知任已。以直前不復周防。而慮後動觸。時忌言爲身災。擠而去之。則爲有功。引而進之。亦或招悔。自非不以利祿爲意。而以仁厚爲心。顧茲鈍頑。誰肯收錄。伏惟某官時望至重。主知已深。方將長育於羣材。專務掩覆於小過。憐其謀身之甚。拙進絕望。而退無歸。知其爲政之雖迂。歲有餘而日不足。

特矯世俗借之齒牙某敢不祇畏簡書益自修飭
豈云報德苟不辱知過此以還未知所措

徐州謝兩府啟

移守河中已愧超陞之異改臨泗上仍叨藩鎮之
雄旣見吏民周覽風俗地形襟要當東南水陸之
衝民食艱難正春夏旱蝗之際宜得一時之循吏
以安千里之疲氓如某者才不逮人學非適用早
塵策府自知拙直之難安屢乞守符意謂苟全之
善計然自往來三郡首尾七年足蹈危機僅脫風

波之險心存吏役都忘學術之源旣未決於歸耕
敢復求於善地伏遇某官權衡萬物高下一心頑
礦悍堅實費陶鎔之力散材踈惡徒施封殖之恩
謹當箠策疲駑鐫磨朽鈍上酬天造次答已知

賀趙大資致政啟

伏審抗章得謝奉冊言還搢紳聳觀閭里相慶竊
謂富貴不爲至樂功名非有甚難樂莫樂於還故
鄉難莫難於全大節歷數當今之卿相或寓他邦
究觀自古之忠賢少有完傳錦衣而夜行者多矣

狐裘而羔袖者有之。至若百行渾圓，五福純備，當世所羨，非公而誰。恭惟致政大資少保道心精微，德望宏遠，無施不可。尤高臺諫之風，所臨有聲。最宜吳蜀之政，才不究於大用，命乃係於生民。與時偕行，不可則止。見故人而一笑，緘有餘歡。念平生之百爲一，無可恨。方將深入不二，獨遊無何。默追璨可之風，坐致喬松之壽。某荷知有素，貪祿忘歸。慕鸞鵠之高翔，眷樊籠而永歎。傾頌之素，敷寫莫窮。

登州謝兩府啟

迂愚之守，沒齒不移。廢逐之餘，歸田已幸。豈謂承宣之寄，忽爲枯朽之榮。眷此東州，下臨北徼。俗近齊魯之厚，迹皆秦漢之陳。賓出日於麗譙，山川炳煥。傳夕烽於海嶠，鼓角清閑。顧靜樂之難名，笑妄庸之竊據。此蓋伏遇某官股肱元聖，師保萬民。才全而德不形，任重而道愈遠。謂使功不如使過，而觀過足以知仁。特借牙齒，曲成羽翼。某敢不服勤，簿領祇畏簡書。策蹇磨鉛，少答非常之遇。息黥補

剗漸收無用之身過此以還未知所措

謝賈朝奉啟

自蜀徂京幾四千里携孥去國蓋二十年側聞松
楸已中梁柱過而下馬空瞻董相之陵酌以隻鷄
誰副橋公之約宦游歲晚坐念涕流未報不貲之
恩敢懷盍歸之意常恐樵牧不禁行有雍門之悲
雨露旣濡空引太行之望豈謂通判某官政先慈
孝義篤友朋首隆學校之師儒次訪里閭之耆舊
自嗟來暮不聞拔薤之規尚意神交特致生芻之

奠父老感歎桑梓光華深衣練冠莫克垂洟於墓
道昔襦今袴尚能鼓舞於民謠仰佩之深力占難
盡

答范端明啟

伏審叅稽古樂追述新書琢石鑄金成之有數立
鈞出度施及無窮搢紳雲集於奉常端冕天臨於
便座偉茲壯觀自我元臣竊以樂之盛衰寄於人
之存否秦漢以下鄭衛肆行雖喜三雍之成旋遘
五胡之亂平陳之後粗獲雅音天寶之中遂雜胡

部道喪久矣孰能起之獨求三代之遺聲允屬四朝之舊德恭惟致政端明丈人耄期稱道直亮多聞進不謀安昔既以身而殉義退猶憂國今推所學以及人豈惟盡力於考音至復傾家而制器蓋事關於治忽必幽贊於神明得商頌十二篇於周大師雖賢者之事也獲古磬十六枚於犍爲郡豈偶然而已哉某本非知音之人空荷移書之辱究觀累日喜愧兼懷徒誦詠於再三豈發明於萬一

杭州謝執政啟

小器易盈宜處不爭之地大恩難報終爲有愧之人到郡浹旬汗顏數四湖山如舊魚鳥亦怪其衰殘爭訟稍稀吏民習知其遲鈍雖尚嬰於寵劇庶漸卽於安閑顧此蠢愚亦蒙徼倖此蓋伏遇某官輔世以德事君以仁嘉善而矜不能與人不求其備故令狂直得保始終指步武於夷途收桑榆之暮景某敢不欽承令德推本上心政拙催科自占陽城之考姦容獄市敢師齊相之言庶寡悔尤少償知遇

答杭州交代啟

罷直禁中本緣衰病分符浙右更竊寵榮既尋少壯之舊游復繼老成之前躅養痾卧治之所蒙成坐嘯之餘顧此鈍頑實爲忝昧伏惟知府待制宏才緯俗雅望鎮浮神馳方切於望塵心照已先於傾蓋借之餘潤成此虛名滕大夫之才豈堪治劇楚令尹之政或許告新望見有期瞻依愈切

謝生日詩啟

蓬矢之祥雖世俗之所尚蓼莪之感迨衰老而不忘豈謂某官意重瓊瑤文成黼黻推仁心而錫類出妙語以嘘枯攝提正於孟陬已光初度月宿直於南斗更借虛名永惟難報之珍但結無窮之好

賀林待制啟

伏審圖舊聖時陞華法從僉言諧允有識歎咨萬木歲寒配喬松於巨栢衆星夜艾凜明月與長庚斧藻昌朝領袖後進傳聞四遠歡喜一詞恭惟某官名重弱齡望高晚節文章爾雅蓋西漢之餘風悃悃無華亦東京之循吏凡閱四朝而後用獨爲

三館之老臣著書已成特未寫之琬琰立功何晚
會當收之桑榆某交舊最深慰喜良甚尺書爲賀
鄙志莫宣

求婚啟

結縭早歲已聯昆弟之姻親垂白南荒尚念子孫
之嫁娶敢憑良妣往款高閑某長子某之第二子
符天質下中生有蓬麻之陋祖風綿邈庶幾弓冶
之餘伏承故令弟子立先輩之愛女第十四小娘
子稟粹德門教成家廟中郎墳典之付豈在他人

太真姑舅之婚復見今日

坡老是王家婿故
有結褵姑舅等語 仰緣

夙契祇聽俞音

賀冬啟

伏以候緹室之清宮瞽告以日卜臺觀之黃稜史
書有年共安消長之來以待陰陽之定恭惟某官
才猷傑異道德深醇靖共正直之休順獲天人之
助某恪守官次阻稱壽觴坐馳傾向之心莫罄安
榮之遇

謝大使土物啟

伏審揚舲造朝、弭節就舍、歸時事於宰旅、方勞遠
勤、發私幣於公卿、亦蒙見及、莫遑辭避、但切感銘、
謝管設大使啟

鳴鹿食野、方主禮之粗陳、驪駒在門、歎賓歡之莫
盡、遽辱移書之重、益慙爲具之疎、卽遂願言、徒增
銘佩

副使啟

伏審舍館初定、徒馭少休、粗接賓歡、方愧餽牽之
陋、曲敦私好、特班琛貢之餘、感佩于懷、愧忤無量

賀時宰啟

伏審光膺考慎、峻陟宰司、孚號揚廷、士識上心之
所尚、置郵傳命、人知聖澤之將流、靡不欣愉、至於
鼓舞恭以某官、直方以大、廣博而良、進以正而正、
邦異乎求以求、政貫六經、百子之學、煥三代兩漢
之詞、昂稟自殊、偉蕭侯之八尺、斗南莫競、凜梁公
之一人、加以絕識、見微曠度、舉遠清心、省事則法
可使復、結繩之約、強本節用、則貨可使若流、泉之
長材、無不可範而成也、譬泥之在鈞、俗無不可易

而善也。猶風之靡草，是皆還至而有效。安見爲事而無功。蓋神考貽謀已完具，而可按。故成王續要，宜纖悉以勿知。此大雅兼持而不移，矧清衷圖任之愈篤，豈繫疎逖所獨詠歌。惟民罔知，合語則聖。凡有照令，率先惠慈。固已遐邇爭傳，室家胥慶。顧此民逢此日之何幸，謂吾相勸吾君以愛人歡聲，格於九天，乖氣消於萬彙。在昔小國如彼，景公損已一言，退星三舍。又况以禹湯大信之誥，有夔契同寅之言，蠢爾憑生，猶知助順。赫然在上，豈不降

康某愚有赤心，老無佞舌，輒忘犯分，顧欲輸誠。然有難言，是在精智。蓋無交則莫與，苟好謀則必成。不惡而嚴，匪怒伊教。終成大賴，豈曰自私。伏念某遭時休明，賦命衰薄。蚤粗蒙於遴選，比久幸於退藏。天雨何私，笑流行之木偶。滄溟不改，嘆自蕩之波。臣重以傾歲周旋，竊嘗撰屨。末塗流落，無復掃門。尚賴補息，剝黥彫朽。糞朽出部，見日去盆。望天悵末力之將殫，愧明恩之莫報。乃利用安身之何有，儻奉法循理之可爲。民社非輕，猶承宣而惴惴。

天淵靡外亦戾躍以欣欣

徐州謝隣郡陳彥升啟

愛代膠西甫違仁庇分符泗上復託恩私祇見吏
民布宣條教郡有溪山之樂庭無爭訟之煩曾何
妄庸獲此僥倖此蓋伏遇某官紀綱千里儀表一
方議論信於中朝予奪公於多士衰罷無術既常
荷於兼容勉厲自將或無忝於知遇感懼之素敷
染難宣

黃州還回太守畢仲遠啟

五年嚴譴已甘魚鳥之鄉一舸生還復與縉紳之
末屢將通問輒復自疑方茲入境之初遽已誨音
之辱披緘驚眩撫已汗惶恭惟某官師帥斯民表
儀多士道德龔黃之右牢圍坐空風流王謝之間
嘯歌自得豈特居人之安堵固將遷客之忘歸路
轉湖陰益聽風謠之美神馳鈴下如聞磬咳之音
瞻詠實勞敷宣罔旣

御精實勞煖宜固期

轉勝創益雖風請之美轉賜餘下吹回響久之音

觀輝自野豈部母人之受謝固殊要客之志轉發

謝多士蓋謝奠黃之林不固坐空風流王情之開

公執妹婦驚却謝日于皇赤動某言西臨何旗月表

未熟辨能問轉對自與方茲人與之何盡日情在

正平謝請日并魚鳥之驚一融土戰身與事後之



